



Vrijednost održavanja rodbinskih veza i popravljivanja odnosa među ljudima (Medina)

Hatib: dr. Abdullah ibn Abdurrahman el-Buajdžan

23. safer 1445. po Hidžri / 8. septembar 2023.

Zaista sva hvala i zahvala pripadaju Allahu. Njega hvalimo, od Njega pomoć i oprost tražimo i Njemu se utječemo od zla naših duša i naših loših djela. Koga Allah uputi na Pravi put, niko ga u zabludu ne može odvesti, a koga On u zabludi ostavi, niko ga ne može uputiti. Svjedočim da nema boga osim Allaha, Koji nema druga, i svjedočim da je Muhammed, sallallahu alejhi ve sellem, Njegov rob i poslanik, dostavio je poslanicu, ispunio emanet, savjetovao ummet i borio se na Allahovom putu onako kako se treba boriti sve dok mu nije došla smrt, neka su na njega Allahova milost, oprost i spas, i na njegovu porodicu i ashabe, i sve one koji slijede njegov sunnet do Sudnjeg dana.

Najbolji govor je Allahov govor, najbolja uputa je uputa Muhammeda ibn Abdullaha, sallallahu alejhi ve sellem. Najgore stvari su novine u vjeri, svaka novina je novotarija, svaka novotarija je zabluda, a svaka zabluda vodi u Vatru.

O vjernici, bojte se Allah izvršavajući ono što vam je naredio i sustegnite se od onoga što vam je strogo zabranio.

“O ljudi, bojte se Gospodara svoga, koji vas od jednog čovjeka stvara, a od njega je i drugu njegovu stvorio, i od njih dvoje mnoge muškarce i žene rasijao. I Allaha se bojte - s imenom čijim jedni druge molite – i rodbinske veze ne kidajte, jer Allah, zaista, stalno nad vama bdi.” (En-Nisa, 1)

O muslimani, održavanje rodbinskih veza, međusobna ljubav, lijep odnos i komunikacija, ispunjavanje obaveza i bratstvo su ibadeti, bogougodna djela i istina koju je Allah naredio muslimanima i propisao za njih nagradu i sevap, a njihovo nepoštivanje tretira grijehom i za njih je pripremio kaznu, počevši od dobročinstva





prema roditeljima i ispunjavanja bračnih prava, preko održavanja rodbinskih veza, pa do prava komšija i prijatelja i ostalih muslimana s kojima nas ne veže bliska veza. Uzvišeni kaže: "Vjernici su samo braća, zato pomirite vaša dva brata i bojte se Allaha, da bi vam se milost ukazala." (El-Hudžurat, 10)

"Zato se bojte Allaha i izgladite međusobne razmirice." (El-Enfal, 1)

Enes, radijallahu anhu, prenosi da je Vjerovjesnik, sallallahu alejhi ve sellem, rekao: "Niko od vas neće biti pravi vjernik sve dok ne bude želio svome bratu ono što želi samom sebi." (Buhari i Muslim)

Numan ibn Bešir, radijallahu anhu, prenosi da je Allahov Poslanik, sallallahu alejhi ve sellem, rekao: "Primjer vjernika u njihovoj međusobnoj ljubavi, samilosti i saosjećanju je kao primjer jednog tijela, kada u njemu oboli jedan dio, i ostatak tijela pati od nesanice i groznice." (Muslim)

Najpreči ljudi prema kojima treba pokazati ljubav, samilost i saosjećanje su naša rodbina. Oni su kao jedno tijelo i islam teži njihovom jedinstvu, bliskosti i okupljanju oko zajedničke riječi. Uzvišeni kaže: "Zato podaj bližnjemu pravo njegovo, i siromahu i putniku! To je bolje za one koji nastoje da se Allahu umile; ti će postići šta žele." (Er-Rum, 38)

Ebu Hurejra, radijallahu anhu, prenosi da je Poslanik, sallallahu alejhi ve sellem, rekao: "Ko vjeruje u Allaha i Sudnji dan, neka održava rodbinske veze." (Buhari)

O ljudi, razilaženje, nesloga, ljutnja, kidanje veza, izbjegavanje, okretanje leđa, mržnja, prezir, neprijateljstvo i sve ono što izaziva nemir i nelagodu u grudima predstavlja temelj propasti i nereda, i uzrok je kidanja rodbinskih veza, rastavljanja bračnih drugova i uništavanja bratske i prijateljske ljubavi. Ebu Hurejra, radijallahu anhu, prenosi da je Allahov Poslanik, sallallahu alejhi ve sellem, rekao: "Ne zavidite jedni drugima, ne nadmećite se u kupovini, ne mrzite jedni druge, ne okrećite leđa jedni drugima, ne uhodite i ne ispitujte jedni druge, neka niko od vas ne prodaje na prodaju svog brata, i budite, Allahovi robovi, prava braća, kao što vam je Allah naredio. Musliman je muslimanu brat, ne čini mu nepravdu, ne ostavlja ga na cjedilu i ne





prezire ga. Bogobožnost je ovdje”, pa je pokazao prema grudima tri puta. “Dovoljno je čovjeku zla da prezire svoga brata muslimana. Svakom muslimanu zabranjeni su krv, imetak i čast drugog muslimana.” (Muslim)

O muslimani, čovjeku se pogled zaledi i srce se stegne kada vidi i čuje kakve se svađe i problemi dešavaju unutar jedne porodice. Šejtan se upleo među njih, zavadio ih i pocijepao njihovo jedinstvo. Poslanik, sallallahu alejhi ve sellem, kaže: “Nema prečeg grijeha da Allah zbog njega ubrza kaznu još na ovom svijetu, uz kaznu na onom svijetu, od nepravde i kidanja rodbinskih veza.”

Znaite da je svođenje rodbinskih kontakata na minimum jedan od oblika kidanja rodbinskih veza, koji uništava bliskost i ljubav među ljudima i negativno utječe na odgoj novih naraštaja. Obnovite svoje veze, požurite sa međusobnim obilaženjem i posjećivanjem, prestanite izbjegavati jedni druge i oživite osjećaje ljubavi i prisnosti. “I svi se Allahova užete čvrsto držite i nikako se ne razjedinjujte.” (Ali Imran, 103)

O ljudi, jedno od Allahu najdražih djela je praštanje ljudima, suzbijanje srdžbe, podnošenje uvreda i neugodnosti, a najviše prava na to, kod nas, ima naša rodbina. Uzvišeni kaže: “i nastojte zaslužiti oprost Gospodara svoga i Džennet prostran kao nebesa i Zemlja, pripremljen za one koji se Allaha boje, za one koji, i kad su u obilju i kad su u oskudici, udjeljuju, koji srdžbu savlađuju i ljudima praštaju - a Allah voli one koji dobra djela čine.” (Ali Imran, 133–134)

“Strpljivo podnostiti i praštati – tako treba svaki pametan postupiti.” (Eš-Šura, 43)

“... a onoga koji oprosti i izmiri se Allah će nagraditi.” (Eš-Šura, 40)

Navikavajte svoje duše na praštanje i prelaženje preko pogreški, nadajući se nagradi, preporučujte jedni drugima strpljenje i samilost, bojte se Allaha i izgladite svoje međusobne razmirice, i pokoravajte se Allahu i Poslaniku, ako ste pravi vjernici.

O ljudi u izmirenju i popravljanju međuljudskih odnosa je svako dobro, i smatra se jednim od najvrednijih ibadeta. Koliko je samo života, imovine i časti Allah sačuvao putem ovog dobrog djela, koliko je ljudi sačuvao od smutnje, koliko je svađa prekinuo i koliko je neprijateljstava okončao! Allah vam je naredio da izmirite





zavađene gašenjem vatre smutnje, svađe i prepirke, zalječivanjem duševnih rana i zakopavanjem zlobe, mržnje i neprijateljstva.

Uzvišeni kaže: "Vjernici su samo braća, zato pomirite vaša dva brata i bojte se Allaha, da bi vam se milost ukazala." (El-Hudžurat, 10)

"Zato se bojte Allaha i izgladite međusobne razmirice." (El-Enfal, 1)

"Nema kakva dobra u mnogim njihovim tajnim razgovorima, osim kada traže da se milostinja udjeljuje ili da se dobra djela čine ili da se uspostavlja sloga među ljudima. A ko to čini iz želje da Allahovu naklonost stekne Mi ćemo mu, sigurno, veliku nagradu dati." (En-Nisa, 114)

Izmirenje ljudi je dobro djelo koje donosi veliku nagradu, približava čovjeka Allahu i čisti njegovu dušu. Ebu Hurejra, radijallahu anhu, prenosi da je Allahov Poslanik, sallallahu alejhi ve sellem, rekao: "Za svaki zglob u čovjekovom tijelu obaveza je dati sadaku svakog dana u kojem sunce izađe, a sadaka je da izmiriš dvojicu, i pomogneš čovjeku da se popne na jahalicu, ili da mu pomogneš da podigne stvari na nju, lijepa riječ je sadaka, svaki korak koji učiniš prema džamiji radi obavljanja namaza je sadaka, da ukloniš prepreku i neugodnost s puta je sadaka." (Buhari i Muslim)

Abdullah ibn Amr, radijallahu anhu, prenosi da je Allahov Poslanik, sallallahu alejhi ve sellem, rekao: "Najbolja je sadaka izmirenje zavađenih." (Taberani)

O vjernici, izmirenjem zavađenih ostvaruje se jedinstvo ummeta, jačaju međuljudski odnosi, čiste duše, spajaju srca i otklanja od ummeta zlo raskola, sukoba i podjele, i svih drugih zala koja oni prouzrokuju, i pomoću njega ummet postaje kao jedan čvrsti i neprobojni bedem i jedno tijelo, u kojem ako oboli samo jedan dio, i ostali dijelovi pate od nesanice i groznice. Ebu Derda, radijallahu anhu, prenosi da je Allahov Poslanik, sallallahu alejhi ve sellem, rekao: "Hoćete li da vas obavijestim o djelu vrednijem od posta, namaza i sadake?" "Hoćemo", rekli su. "Izmirenje ljudi, jer je narušavanje međuljudskih odnosa halika. A halika je ono što upropaštava vjeru i briše sevape."





Bojte se Allaha, i dajte svakome njegovo pravo. Ebu Hurejra, radijallahu anhu, prenosi da je Allahov Poslanik, sallallahu alejhi ve sellem, rekao: "Svako pravo bit će izmireno na Sudnjem danu, pa čak i pravo bezroge ovce koju je ubola rogata ovca."
(Muslim)

Obračunajte svoje duše prije nego što budete polagali račun, riješite se svih dugova prije smrti, tražite halala od onih čija ste prava uzurpirali, namirite nepravdu i dajte svakome njegovo pravo. "Neka vas mržnja koju prema nekim ljudima nosite nikako ne navede da nepravedni budete! Pravedni budite, to je najbliže čestitosti." (El-Maida, 8)

Zatim, znajte da vam je Allah naredio da donosite salavate i selame na Njegovog Vjerovjesnika, pa je rekao u mudroj Objavi: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljite mu pozdrav!" (El-Ahzab, 56)

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

